



風（饒平腔）

風 得人惜該下
竹尾仔睜著佢 搖等屎朥花
細草仔睜著佢 跔等搖一下
佢兜相賽對佢講 有閒正來奈
風 得人惜該下
連隔壁鄰舍煮菜个香氣 佢都搵手分分大自家

風 得人惱該下
滿哪仔去拍等窗門尋人冤家
吵到阿嬲睡毋落覺
吵到嬰兒仔嘍哇哇
老嫩大細全分佢吵到無結無煞
風 得人惱該下
連禾埕肚炙个菜脯絲 也分佢搵到鬢鬚鬚

風 得人驚該下
天嶼个雲 分佢逐等走
屋嶼个鉛片 分佢吹到兵兵磅磅
佢像一個爽頭王
毋管天嶼地泥下 佢都愛去動一下
風 得人驚該下
連路脣頭个大樹 都會分佢擲啊起 橫到地泥下

作者感言

在「98 年教育部臺灣閩客語文學獎」徵稿該下，堵好學校肚正開學，十分个無閒。毋過恁久來，只要有母語文學創作，佢定著會參加一額，恁趕个時間總算也交出一篇詩作，毋過盡主要係鼓勵自家有參加同學習个心。感謝主辦單位同評審委員个辛苦，還有熱烈參加母語文學創作个好朋友，大家共下來加油，分母語文學創作緊來緊好。

詹淑女

臺北縣新莊市新泰國民小學 本土語言支援教師

